

03 JAN 2002

DEWAN-USAHAWAN

DEWAN MUDA BERHARAP USAHAWAN LELAKI MELAYU PEKA DENGAN ERA GLOBALISASI

KUALA LUMPUR, 3 Jan (Bernama) -- Dewan Perniagaan Melayu Malaysia (DPMM) berharap portfolio terbarunya yang diberi nama Dewan Muda akan melahirkan lebih banyak usahawan lelaki Melayu yang mampu berdaya saing dalam era globalisasi.

Bercakap kepada pemberita pada sidang akhbar majlis pra pelancaran Dewan Muda hari ini, pengerusinya, Azlan Shah Jaffril berkata, pihaknya mensasarkan sebanyak 500 hingga 2,000 ahli bagi tahun pertama ia dilancarkan.

Dewan Muda yang telah ditubuhkan pada Julai 2001 adalah hasil pengstruktur semula DPMM di bawah kepimpinan presiden Datuk Seri Abdul Rahman Maidin, khas untuk usahawan-usahawan lelaki Melayu yang berumur di antara 18 hingga 35 tahun.

Ia akan dilancarkan secara rasminya pada 11 Januari ini di Pusat Dagangan Dunia Putra dan akan dirasmikan oleh Perdana Menteri, Datuk Seri Dr Mahathir Mohamad.

Azlan Shah berkata penubuhan Dewan Muda adalah perlu memandangkan golongan usahawan muda pada hari ini kurang peka dengan persekitaran yang berlaku dalam dunia ekonomi sekarang dan juga tidak bersatu.

"Mereka lebih suka membawa haluan masing-masing dan kurang prihatin dengan isu-isu ekonomi yang berlaku sekarang. Mereka kata mereka pernah dengar tentang Kawasan Perdagangan Bebas ASEAN (AFTA) dan Pertubuhan Perdagangan Antarabangsa (WTO) tetapi mereka tidak tahu secara menyeluruh apakah yang dimaksudkan dengan AFTA dan WTO," katanya.

Oleh yang demikian, katanya perhatian yang lebih harus diberikan kepada usaha untuk melengkapkan belia dengan pengetahuan dan kemahiran yang perlu bagi membolehkan mereka menyesuaikan diri dengan kepesatan pembangunan ekonomi negara dan arus globalisasi.

Antara strategi yang telah disusun, Azlan Shah berkata, Dewan Muda akan menjalankan seminar-seminar perniagaan dan mewujudkan bazaar-bazaar peruncitan di seluruh negara.

Beliau juga berkata antara objektif penubuhan Dewan Muda ini adalah untuk mewujudkan jaringan perniagaan antara peniaga-peniaga Melayu dan berkongsi maklumat perniagaan dengan kelab-kelab usahawan yang lain di bawah DPMM. -- BERNAMA

FAY OS